

## **KM aprova medida ezekusaun EE ba da-11**

**DILI, 02 marsu 2021 (TATOLI)**–Konsellu Ministru (KM) aprova projetu Dekretu Governu, ne'ebé apresenta hosi Primeiru-Ministru (PM), Taur Matan Ruak, kona-ba medida ezekusaun Estadu Emerjénsia (EE) ba da-11, ne'ebé renova hosi Dekretu Prezidente Repúblika número 15/2021, iha loron 01 marsu hodi hatán ba pandemia COVID-19.

“Estadu Emerjénsia daudaun ne'e renova, abranje territóriu nasional tomak no vigora hahú oras 00:00 loron 04 marsu 2021 to'o oras 23:59 iha loron 02 abril 2021,” Ministru Prezidénsia Konsellu Ministru, Fidelis Manuel Leite Magalhães, relata hafoin reuniaun ezekeutivu iha Palásiu Governu, tersa ne'e.

Portavós Governu ne'e esplika, ein jerál mantein medida ne'ebé antes aprova ona, liuliu bandu ultrapasa fronteira ba fins tradisionál ka kustumeiru no asesu ba merkadu reguladu, sirkulasaun internasionál hala'o de'it liuhosi postu fronteira terrestre, ne'ebé bele taka tuir desizaun Ministériu Interiór (MI) bainhira iha razaun seguransa ka saúde pública justifika.

Aleinde ne'e, sujeisaun ba ema hotu ne'ebé hakarak tama ka sai hosi territóriu ba kontrolu sanitáriu, impede sirkulasaun internasionál ba ema hotu ne'ebé hatudu sintoma COVID-19, impozisaun ba izolamentu profilátiku ou kuarantena ba ema hotu bainhira tama iha territóriu nasional no sujeisaun ba ema hotu ne'ebé infetadu COVID-19 ba izolamentu terapéutiku.

Durante vijénsia diploma ne'e, ema hotu ne'ebé hela iha Timor- Leste tenke mantein distánsia pelumenus metru ida ho ema seluk, utiliza máskara oin taka inus no ibun bainhira asesu ka tama ba fatin públiku ka privadu ba utilizasaun koletiva, fase liman bainhira hakarak tama ba estabelesimentu komersiál no industriál sira ka hainhira halo serbisu iha edifísiu serbisu administrasaun pública.

“Oras ne'e prevee possibilidade suspende temporária prosesu ensinu no aprendizajen, iha rejime prezensiál, no karik departementu governamental responsável ba saúde pública rekomenda ho efeitu atu hamenus risku transmisaun COVID-19,” governante ne'e subliña.

Dekretu Governu ne'e prevee katak família hosi misaun diplomátika akreditada iha Dili bele mós kumpre períodu izolamentu profilátiku iha fatin indikadu hosi Ministériu Saúde ka hela iha fatin rasik.

**Jornalista: Antónia Gusmão**

**Editora: Julia Chatarina**

## Governu kontinua aplika serka sanitária iha Covalima, autoriza transporta sasán



*Primeiru-Ministru, Taur Matan Ruak, prezide reuniaun Konsellu Ministru, iha Palásiu Governu, tersa (02/03). Imajen TATOLI/Egas Cristóvão*

**DILI, 02 marsu 2021 (TATOLI)**—Governu kontinua aplika serka sanitária iha munisípiu Covalima, maibé fó fleksibilidade atu ema transporta sasán hanesan ai-han, nesesidade bázika no medikamentu ba munisípiu ne'e.

Governu hola desizaun ne'e liuhosi reuniaun Konsellu Ministru (KM) hodi halo aprovasaun ba projetu Rezolusaun Governu, ne'ebé renova impozisaun serka sanitária iha munisípiu Covalima.

“Mantein bandu deslokasaun hosi munisípiu ida-ne'e bá munisípiu seluk, entre oras 00:00 loron 04 marsu 2021 to'o oras 23:59 iha loron 02 abril 2021. Ministru Interiór bele mós autoriza deslokasaun ema no merkadoria, ho fundamentu razaun umanitária ba protesasaun saúde pública, seguransa pública ka interese públiku, no define kondisaun saida maka presiza realiza,” Ministru Prezidénsia Konsellu Ministru, Fidelis Manuel Leite Magalhães, relata hafoin reuniaun ezeutivu iha Palásiu Governu, tersa ne'e.

Enkuantu, ema hirak ne'ebé lori ai-han no sasán emerjénsia sira ne'e kuandu filafali mai Dili sei la tama kuarentena tanba iha rezolusaun Governu ne'e la prevee.

Portavós Governu ne'e klarifika, bainhira atu lori hahán no sasán emerjénsia sira ba Covalima, presiza halo komunikasaun ho Sala Situasaun Sentru Integradu Jestaun Krize (CIGC, sigla portugés) iha Dili, nune'e mós CIGC iha Covalima liuhosi Unidade Forsa Territoriál hodi lori transporte ho sasán sira ba pontu *ou* fatin ne'ebé define ona nu'udar fatin seguru, no to'o iha fatin sira ne'e maka pesoál lojízitika Covalima nian foti hodi halo tuir medida sanitária molok distribui ba fatin sira ne'ebé presiza.

“Tanba moras ne'ebé daudaun la'o hela iha Suai foin to'o iha nível ida hanaran transmisaun lokál, katak ita sei hatene hela fatin ema hirak ne'ebé infetadu COVOD-19, ho ida ne'e katak ita seidauk to'o iha faze ida hanaran transmisaun komunitária, entaun sei bele loke dalan atu ita iha korridór umanitária ida-ne'e,” nia akresenta.

Hafoin avalia situasaun sira, KM deside halo kotu ona serka sanitária iha munisípiu Bobonaro tanba tuir relatóriu hosi Ministériu Saúde (MS) katak munisípiu ne'e la rejista kazu transmisaun lokál.